



Lingzlwg Coengcoeng vaiqvut bin hwnj go faex hung he, yawj coh gizgyae, angq dwk naeuz: "Daih-vuengz dauqma lo!"

Lingzlwg Lingzlingz gaeugaeu aen'gyaeuj, naeuz: "Daihvuengz coengmingz gvaq vunz, sam bi gaxgonq bae byasien baiq saefouh hag bonjsaeh, seizneix haengdingh engq ak lo! Raeuz daeuj gaujgauj de, yawj daihvuengz seizneix bonjsaeh baenz-lawz yiengh."

Goenglingz lumhlumh hangz mumhau de naeuz: "Gou daeuj ok diuz daez he, $(24-3x) \div 6 = \dots$ "

Lingzlingz sing hung naeuz: "Ndaejaeng 1."

Lingzlwg Mingzmingz ciepdwk naeuz: "Lij dwg daeng 2 ba."

Coengcoeng daj gwnz faex rod roengzdaeuj, naeuz: "Gou siengj hawj aen soq neix daeng 3."

Goenglingz riuhaa naeuz: "Cungj ndaej! Hawj daihvuengz siengjsiengj, dang diuz suenqsik neix ndaej soq baenbied dwg 1, 2, 3 seiz, x baenbied dwg geijlai."

Lingzlingz nyaueq bwnda naeuz: "Raeuz daeuj siengjsiengj gij giuj-miuh ndawde gonq, yienghneix caj

yaep he dingq daihvuengz hoizdap le, raeuz cijndaej ndawsim miz soq. Gou sien daeuj naemj dang $(24-3x) \div 6$ daeng 1 seiz, x daengj geijlai. Yienghneix aen suenqsik neix wnggai sien suenq swngzfap, caiq suenq gemjfap. Doeklaeng suenq cawzfap. Yaek siengj rox x ndaej geijlai, couh fanj gvaqdaeuj doisuenq, couh dwg cawzfap $\rightarrow$ gemjfap $\rightarrow$ swngzfap. Sien siengj $\square \div 6 = 1$, ndaejdaengz $24-3x=6$; caiq siengj $24-\square=6$, ndaejdaengz $3x=18$; doeklaeng couh suenq ndaej ok $x=6$.

Goenglingz riunyumj naeuz: "Deng lo, neix cingq dwg yungh le fap 'dauqdoi' daeuj gej daez."

Mingzmingz nyeng aen'gyaeuj

siengjsiengj le, naeuz: "Gou hix yungh 'dauqdoi' cungj fap neix, hawj aen vwndiz daihngaih ra daengz dapanq. Aeu yinhsuenq swnh gonqlaeng ndaw daez dauj gvaqdaeuj doisuenq, $(24-3x) \div 6 = 2$, $(24-3x)$ dwg 12; ciepdwk $24-3x=12$, $3x$ dwg 12; doeklaeng $3x=12$, $x=4$."

Goenglingz riunyumnyum lumh aen'gyaeuj mingzmingz naeuz: "Fuengfap mingzmingz sengdoengh hingzsiengq, caen ndei!"

Seizneix, daihvuengz caij gij fwj haj saek daj gwnz mbwn mbin roengzdaeuj, riu dwk cam naeuz: "Sou cingq gangjsebseb gijmaz ha?" Daihgya sikhaek humx hwnjbae...

(Lij Cilungz)



Gou Dwg Byawz

我是谁

Gou dwg byawz? Itcig gvaqdaeuj lienz gou swheij cungj gangj mbouj cingcuj.

Youq ndaw hagdangz, gou dwg boux siujhagseng seiq nienzgaep he. Youq ndaw ban, gou mbouj dwg hagseng gig maenhndei, hoeng hix mbouj dwg boux hagseng ca. Aenvih moix baez gaujsi, geij mingz gaxgonq mbouj miz gou, dangyienz geij mingz doeklaeng hix mbouj miz gou.

Gijwnq ne? Neix couh bae cam bouxwnq lo.

Lauxsae yijvwnz naeuz gou cozvwnz sij ndaej haemq ndei, neix wnggai caeuj gou bingzseiz gyaep yawj saw, gyaep sij baen mbouj hai.

Suyoz lauxsae naeuz gou dwg boux lujlaj he, cujyau dwg bingzseiz sij cozyez simco, ciengzciengz sij loek.

Doengzdaiz gou naeuz gou gijmaz cungj ndei, couh dwg daiq

aeuhingz lo. Ai, gou cingznyiuh, mboujlwnh guh gijmaz saeh, gou cungj gyaep biujyienh swheij, cungj nyinhnaeuz swheij miz dauhleix.

Youq ndaw ranz, daxgoeng naeuz gou dwg boux ngaiznyed, aenvih gou sij cozyez cungj dwg ngaizngaiz nyednyed, ngaiz daengz doeklaeng cij gipgip muengzmuengz sij sat.

Daxbuz naeuz gou dwg boux ngahgwn, baez yawjraen ndei gwn, couh gwn mbouj dingz.

Yienghneix cunggez mbat he, gou cij rox laxlawz gou dwg boux vunz hagsib itbuen, gyaep sij cozvwnz, lujlaj, aeuhingz lai, ngaiznyed caeuj ngahgwn he. Ai, yawjdaeuj gou yaek ndeindei gaj gij loengcawq gou bae lo.

(seiq nienzgaep Sung Vwnz-ginh)

Vih Siengjmuengh Roengzrengz

为梦想努力



Moix baez yawjraen cangh-fwen youq gwnz daizheiq ciengq go seiz, gou couh hozhaenz dangqmaz, liuhsiengj ndwn youq gwnz daizheiq byaujyenj haenz dwg swheij.

Dang boux canghfwen couh

yaek rox ciengqgo diuqfoux. Vihliux saedyienh aen siengjmuengh neix, gou camgya le singhyoz beizyinhbanh. Mwh hwnj goqsinghyoz, gou daegbied nyinh-caen, ciuq lauxsae son gij fuengfap fatyaem ciengqgo. Mwh youq ndaw ranz, gou hix roengzrengz boih goswz, lienh ciengq. Gou lij camgya vujdau beizyinhbanh, lienh atga, enj-hwet..., moix baez cungj baeg dwk hanh lae hanh roenx. Miz seiz siengj mbouj lienh lo, hoeng baez siengj daengz siengjmuengh swheij, gou youh genhciz roengzbae.

Vihliux saedyienh aen siengjmuengh neix, gou itdingh itcig roengzrengz!

(ngeih nienzgaep Sih Caijyingz)



Dingdingh

默默

Seizgan youq gizlawz? Gou ciengzciengz yienghneix cam swheij. Seizgan youq ndaw dujva hai le youh reuq, youq ndaw mbawfaex gwnz faex heu le youh henj, youq ndaw seiqgeiq mboujduenh doxlawh doxvuenh.

Miz ngoenz ndeu vaiqhaemh, gou riu aen daehsaw ma daengz ranz, naengh youq naj daiz luenh sij geij mbat cozyez, aenda mbouj rox mbouj nyinh cienq daengz aen soujgih youq henj haenx bae. Aen soujgih haenx lumj miz fapswd nei, ngaue aensim gou bae lo. Aenmbwn rog cueng ciemhciemh deng saekndaem daz ndaej ndaemndat, daengdaiz gwnz daiz rongh lo, bonjcozyez lij ciuqgaeuq baij youq gwnz daiz. Gou bonjlaiz wnggai youq naj daiz sij cozyez haenx, seizneix cix cij goq yawj aen soujgih

ronghsag guhcaemz. Aencung gwnz ciengz yiengj dida dida, cimfaen cimmiux mbouj dingz daengdoengh dieg de, gij seizgan gou couh yienghneix laeglemx byaij bae lo.

Gou itcig guhcaemz daengz aenda saepsat, cij yawj aencung gwnz ciengz mbat he. Gou doeksaetyat, seizgan gingqyienz bae ndaej baenz vaiq! Sam diemj cung couh yienghneix dingdingh deuz bae lo, vihmaz mbouj miz vunz lwnh gou saek mbat ne? Mbawbiuj najriu gwnz ciengz lumj dwg riu gou, gou ganjvaiq vut aen soujgih fatndat haenx roengz, naengh youq naj daiz sij gij cozyez caeux couh wnggai sij sat haenx.

Daj seizde hwnj, gou gietsim gajbienq swheij. Gou maqmuengh moix faencung cungj cungsad dohgya, yienzhaeuh lumj ndaej

hingz nei daekieq yawj mbawbiuj najriu gwnz ciengz. Mbouj roxnyinh daengz, yienghneix caeuj seizgan doxbeij gaenq baenz bouhfaenh ndaw gwndaenj gou he lo.

Seizgan gvaq ndaej gig vaiq, youq gij seizgan dinjdet bonjfaenh, mwngz siengj guh di gijmaz, mwngz youh ndaej guh di gijmaz ne? Dwg dadaengx dwk yawj de dingdingh byaij bae, roxnaeuz yungh de daeuj guh gij saeh miz yungh? Seizgan lumj rumz ityienh, daeuj ndaej vaiq bae ndaej hix vaiq, vaiq daengz mwngz lienz gij riz de cungj ra mbouj raen.

Dujva dingdingh reuq le youh hai, mbawfaex dingdingh heu le youh henj, seiqgeiq dingdingh bae le youh dauq. Hoeng seizgan raeuz bae le couh mbouj caiq dauq lo.

(roek nienzgaep Yenz Lingzvei)